

JISAS bin dai en imbin gidap laibala igin

"Nomo enibodi bin laigim im,
en melabat bin gibit bekboun langa im.
Imbin abum loda trabul en pein langa im laif.
Nobodi nomo bin wandim luk langa im.
Melabat nomo bin rispek langa im, en melabat bin tok,
'Im nomo enijing. Im najing.'

"Melabat bin reken God bin panishim im
wen imbin abum detlot trabul en pein.
Bat najing! Imbin abum detlot trabul en pein blanga melabat.
Dumaji blanga melabat nogudbalawei deibin beldim im,
en gibit im loda pein langa im bodi.
Imbin deigim det panishmen blanga melabat
en imbin meigim melabat jidan brabli gudbalawei.
Olabat bin gajulum im en deigim im blanga dai,
dumaji nobodi bin gibit im feyago.
Nobodi bin jingabat wanim garra hepin langa im.
Nobodi bin sabi imbin gibit im laif blanga
det brabli nogudbalawei blanga melabat."

Wal YAWEI bin tok,
"Wal lagijat na aibin meigim det plen blanga
det wekinmen blanga abum det trabul en pein,
en gibit miselp jis laiga sekrefais ofring
blanga deigimwei ol detlot nogudbalawei blanga ola pipul,
en meigim olabat jidan nomo giltiwan.
En ai garra gibit im gudbala ting en meigim im jidan
brabli haibala garram pawa, dumaji imbin gibit im laif.
Sambala bin reken imbin dum nogudbala ting,
bat imbin dai blanga ola nogudbalawei blanga ola pipul,
en imbin prei blanga olabat blanga larramgo
olabat fri brom olabat nogudbalawei."
Lagijat na YAWEI bin tok.

